

Zeit ferrs Lese

Wie isch vor e paar Daach beim Schorsch gewese bin, habb ischen gefroochd: Was mächsden su iwwer die Feierdaach, seiderr dehoom?

Ei joo, gibt de Schorsch ze Antwort, die Kinner unn die Enkel kumme omm ersde Feierdaach bei uns, awwer donn sinn merr alloons. Isch habb merr vorgenumme, zwische de John mir e bissi Zeit ferrs Lese ze numme.

Unn, frooch isch, was willsden lese?

Doo hodder gegrinst, de Schorsch: Ei dess Buch von dir mett dene Flerschemer Naumersleit unn dene Fischer in Flerschem. Wie kimmsde donn iwwerhaupt uff de Titel „Das Lächeln der Lisbet Naumerin“?

Jetzt habb isch gegrinst. Weil die jung Fraa ess Vorbild ferr die Madonna gewese iss – also dess nemm isch oo –, die im Wissbadener Museum stehe dut und die mir ferr die Marienkapell in de Bohnhofstrooß hawwe noochschnitze losse.

Seet de Schorsch: Isch habb die joo schunn geseh, die lacht su schee unn isch waaß, dass derr dess gut gefalle hott.

Isch saach: Ja, unn doo habb isch merr gedenkt, weil kooner genau wisse dut, wie die korrz vor dem Jahr fuffzehunnerd doorum entstonne iss unn ferr was, donn mächsde halt enn Roman draus unn schreibst aach, wie dess in dene John in Flerschem gewese soi kennt, mett dene Fischer, wie die im Moo die Fisch gefonge hawwe, wie die deferr gesorchd hawwe, dass de Äldesde vunn ihrne Buwe dess Fischerhondwerk rischdisch gelernt hott unn doodeferr aach uff die Wanderschaft gonge iss. Aach wie die Flerschemer nooch Eltville, dess hott doomols noch Ellfeld gehaaße, midde im Winder mett Gaul unn Schlitte gefahrn sinn, weilse bei emm Holzschritzer dort die Madonna bestellt hawwe, habb isch beschriwwe. Unn weil sellemols aach dess Landwehr unn die Wart gebaut worrn iss, kann merr des aach in moim Buch lese.

De Schorsch druff: Isch habb schunn geheerd, dass dess e schee Buch worrn iss, aach mett Woibau unn Bienehaltung unn noch su Sache vumm alde Flerschem. Unn dess Buch kann merr in de Buchhondlung in de Wickerer Strooß kaafe?

Isch saach: Ja. Awwer dort konnsde jetz aach noch e onner Buch kaafe, su enn Krimi mett de Woiberrsche in Wicker unn meddem Dedektiv unn meddere Leich unn su, unn dess Buch hott moin Kummbeer Alex Rühl geschriwwe, waaßde, der mett merr dess Flerschemer Werrderbuch gemacht hott. Dess Buch iss gut ze lese, unn wenn emol koon Krimi im Fernseh iss. dusde halt enn scheene Heimatkrimi lese.

Doo moont de Schorsch: Ei wenn ihr all Bischer schreiwe dut, donn will isch aach emol oons schreiwe.

Schorsch, gebb isch ze Antwort, mach dess, unn dess werdd bestimmt aach indresonnd, wenn du emol doi Zeit medde Zeltlaacher unn de Kerweborsch unn mett doine ville Erfindunge ...

... die nie ebbes worrn sinn, hott de Schorsch mich unnerbroche.

... awwer gude Idee hosde immer noch unn e Buch vunn dir wär sicher sponnend.

No ja, seet doo de Schorsch, dess muss nitt soi, lieber due isch doi Buch lese unn aach dess vunn doim Kummbeer Alex.

Eiern Honnes